


MPE MISO NA

BANGO MAFUNGWAMAKI

MPE BAYEBAKI YE

 Na Nsango-malamu ya Santu Luka, kobanda na mokapo ya 24 mpe molongo ya ntuku misato . . . molongo ya 31, to nakoloba molongo ya 30 ya mokapo ya 24.

Mpe ekomaki ete, wana efandaki ye kolia elongo na bango, mpe azwaki lipa, mpe apambolaki yango, mpe abukaki yango, mpe apesaki bango.

Mpe miso na bango mafungwamaki, mpe bayebaki ye; mpe alimwaki na liboso na miso na bango.

Mpe balobanaki moko na mosusu ete, Mitema na biso ezalaki kopela kati na biso te, wana ezalaki ye kosolola na biso na, njela, mpe wana afungolaki makomi mpo na biso?

² Mpe tika ete Nkolo ábakisa mapamboli na Ye. Motó ya liteya na ngai, soki nakobenga yango na mpokwa oyo, ekozala: *Mpe Miso Na Bango Mafungwamaki Mpe Bayebaki Ye*. Sikawa molunge ezali, kasi nakosepela ete bókokoka koyika mpiko na motema molai na ndenge bokokoka, mpo na mwa ngonga moke, mpe nakomeka kokende nokinoki. Kasi sikawa tolingi kotala na limemia nyonso Liloba, Liloba ya bikamwa na Nzambe. Mpe tozali kobondela ete Nzambe, na lolenge moko boye, áfungola miso na biso na mpokwa oyo.

³ Soki Pásika ezali kaka kosepela lisolo moko ya likambo eleká, mpe kaka yango, na bongo tozali na mwa ntina ya kotia ntembe, tozali na ntina moke ya komituna, mpamba te ekokaki kotikala likoló ya likanisi kaka ya kozwa liloba. Mpe soki Klisto ápesaka te bilaka oyo Ye apesaki, mbele biso mpe tolingaki, tolingaki kozala na ndangá oyo tozali na yango te.

⁴ Kasi Nkolo na biso apambolami, wana Azalaki awa na mokili, alobaki: “Nsima na ntango moke, mokili ekomona Ngai lisusu te.” Sikawa, liloba wana ya *mokili*, euti na “molongo ya mokili, bato ya mabelé.” “Mokili ekomona Ngai lisusu te. Kasi bino bokomona Ngai, mpo Nakozala elongo ná bino, ata kati na bino, kino na nsuka ya mokili.” Sikawa, Maloba yango ezali mpenza ya solo lokola Maloba mosusu nyonso oyo tosili koloba kati na mposo mobimba oyo, uta na Biblia, bobele solo mpenza kaka ndenge Maloba mosusu nyonso kati na Biblia ezali. “Nsima na ntango moke, mokili ekomona Ngai lisusu te. Miso na bango

ekofungwma ata moke te.” Ezali na bato oyo babotami na mokili, kasi na mokano na Nzambe te, kasi kopona na bango moko ya bopimi balingaki kondima Ye te soki Átelemaka awa kosololáká na bino na mpokwa oyo. Ezali mawa mpo na koloba yango, kasi Biblia elobaki ete: “Babótámáki na mokili oyo, mpo na ekweli oyo,” Yuda, mpe pene na molongo ya 3.

⁵ Sikawa, kasi mpo na bino, na mpokwa oyo, baoyo boyei mpe botelemi zingazinga na kati na ndako oyo, mpe bosangani ebele esika moko na mwa ndako oyo ya molunge boye, boyei ata moke te mpo bámona bino. Boyei mpo na ntina moko. Mpe, na komona na ngai, boyei ná bosembo ya mitema na bino, mpo na kotambola pene koleka ná Nzambe, kolongwa awa, na mpokwa oyo, moto malamú koleka ndenge bozalaki ntango bokotaki. Nde likambo oyo nabondelaki wana nazalaki kokóta na ekuke, na mpokwa oyo, “Nkolo, komisa ngai moto malamú koleka ntango nakobima, na mpokwa oyo, koleka ndenge nazali wana nakoti.” Sikawa ntango Á. . .

⁶ Liboso ya kokende na Ye, Abimisaki maloba ya motindo oyo. Alobaki: “Ye oyo akondimaka Ngai. . .” Santu Yoane, mokapo ya 14, molongo ya 7. “Ye oyo akondimaka Ngai, misala mizali Ngai kosala, akosala yango mpe lokola; akosala koleka oyo, mpo ete Nakokenda epai na Tata na Ngai. Ngai nakokenda, mpe nakozonga lisusu.”

⁷ Sikawa, tokomona misala oyo Ye asalaki. Misala nini Ye asalaki? Alobaki te ete azali moto monene, Azalaki bobele Moto na komikitisa. Azalaki koloba na maloba ya likoló koleka te, Azalaki koloba kaka lokola Moto nyonso. Azalaki kobika katikati na babóla, “nkaja ezalaki na mabulu, mpe bandeke ezalaki na ba-zála, kasi Ye azalaki na esika ya kotia motó na Ye te.” Azalaki na elamba moko, oyo epesamelaki Ye, “etongamaki na biteni te, ezangá esoneli kati na yango.”

⁸ Nde ntina oyo babwakaki mbese likoló na yango. Ezalaki bongo mpo na nini? Mpo lisakoli ya Kondimana na Kala esengelaki kokokisama, “Bakaboli bilamba na Ngai, babwaki mbese mpo na kokabola mokóto na Ngai.” Boye bakokaki kopasola yango na esoneli te mpo na kokabola yango, esengelaki bábwaka mbese mpo na yango, mpe yango ezalaki mpo na kokokisa lisakoli ya Kondimana na Kala.

⁹ Kasi tokomona, kaka na mwa ntango moke, Asalaki nini? Mpe nandimi ete, na mpokwa oyo, ezali nzala na mitema na biso nyonso, longwa na oyo ya moke koleka kino na oyo ya mokoló koleka, na mpokwa oyo, mpo na komona Yesu Klisto. Ezali mposa ya motema na ngai. Mpe mpo na nini ezali bongo? Soki tolobi longwa na makomi. . .

¹⁰ Ba-radio ebeleli yango lelo, ba-televizio ebongisi bamanàka, masano esili koloba, ete: “Azali awa te, kasi Asili kosekwa!”

11 Ee, na bongo, soki Asili kosekwa, Biblia elobi, na Baebele 13:8: “Azali motindo moko lobi, lelo mpe libela.” Sikawa, bótala epai wapi yango ezali, etonga. To ezali Solo, to ezali Solo te. Ete, soki yango ezali Solo te, na bongo Biblia ezali lokuta, na boye Maloba ezali lokuta; na bongo tosili kobunga, mpe lisekwa ya bakufi ezali te, mpe tozali bobele komekola-kondima. Kasi soki ezali Solo, na bongo Yango esengeli komitatola Yango moko.

12 Soki olobi ete mái oyo ezali na mái, natikálá komona mái liboso te, sopela ngai yango, mpe soki epolisi ngai te, boye maloba na yo—na yo ezali solo te, kasi soki osopi yango likoló na ngai, mpe napoli, boye maloba na yo ezali solo.

13 Soki Klisto azali motindo moko lobi, lelo mpe libela, boye Biblia ezali solo. Soki Azali motindo moko te lobi, lelo mpe libela, boye Ezali solo te. Soki Maloba na Nzambe ezali solo te, boye Klisto azali solo te. Na bongo, soki Maloba na Nzambe ezali solo te, Nzambe azali solo te. Kasi, na bongo, soki Liloba na Nzambe ezali solo, boye Biblia ezali solo, Nzambe azali solo, Klisto azali solo, mpe tosengeli kozala sémbó na Likambo yango. Solo mpenza!

14 Sikawa, ntango Azalaki na mokili, Alobaki te ete Azalaki mobikisi monene. Bato boni bayebi ete Mwana na Nzambe atikálá koloba te ete azalaki mobikisi na nzoto? Ya solo mpenza. Alobaki: “Nakoki kosala eloko moko te na Ngai moko, bobele oyo namoni Tata kosala. Ezali Ngai moto nasalaka misala yango te,” Alobaki: “ezali Tata oyo afandi kati na Ngai. Ye nde asalaka misala yango.” Misala ya ndenge nini Asalaki?

15 Tomoni kati na Biblia, epai wapi moto moko na nkombo ya Filipino abikisamaki. Mpe akendeki kokutana na moninga moko, Natanaele, kuna na nsima, na ntáká ya kilometre ntuku minei na mwambe zinga-zinga na ngomba. Amemaki ye epai na Yesu. Mpe ntango amonaki ye, azalaki na nse ya nzete, kobondela. Mpe alobaki: “Yaka komona Nani oyo biso tosili komona: Yesu ya Nazaréte, mwana na Yosefe.”

Alobaki: “Eloko ya malamú ekoki kobima nde na Nazaréte?”

Alobaki: “Yaka komona.”

16 Yango nde litatoli ya malamú koleka. Kozua maloba ya moto mosusu te mpo na Yango. Yáká, komona mpo na yo moko! Alobaki: “Yaka komona.”

17 Mpe ntango ayaki, Yesu atelemaki na molongo, ntango mosusu azalaki kobóndela mpo na bato. Mpe ntango Filipino ayaki, elongo ná Natanaele, Yesu alobaki: “Tala Moyisraele oyo kati na ye bokosi ezali te!”

18 Alobaki: “Oyebaki ngai ntango nini, Rabuni?” Ekamwisaki ye. “Oyebaki ngai longwa ntango nini?”

19 Alobaki: “Liboso Filipino ábenga yo, ntango ozalaki na nse ya nzete, Namonaki yo.” Ntáká ya kilometre ntuku mwambe mosika, na nzela ya ngomba, ata bongo, “Namonaki yo.”

20 Yango etalisaki Nani Ye azalaki. Azalaki Nzambe oyo na-bisika-nyonso; bobele mosakoli te, kasi Nzambe Ye moko amimonisaki kati na nzoto. Nde ntina oyo Akokaki kotia yango, bomoi na Ye, na mabele, mpe kokamata yango lisusu.

21 Mokolo moko mwasi moko moke ayaki mpo na kotóka mái. Mpe Asololaki na ye, mpe alobaki: “Mwasi, pesa Ngai mái ya komela!”

22 Alobaki ete: “Ezali momesano te mpo na bino Bayuda kosenga biso, Basamalia, ndenge oyo. Tozalaka na boyokani te biso na bino.”

23 Alobaki: “Kasi soki oyebaki Nani oyo ozali kosolola na ye, olingaki kosenga Ngai mái. Nalingaki kopesa yo Máí oyo oyáka awa te mpo na kotóka.”

24 Mpe alobaki: “Liziba ezali mozindo, Misie. Ozali na eloko ya kotokela te, mpe epai oyo Okoki kozwa Máí yango.”

25 Azalaki kosala nini? Azalaki koluka kosimba molimo na ye. Mpe ntango Amonaki likambo na ye, likambo na ye ezalaki ete azalaki kobika kati na ekobo. Azalaki na mibali mitano, mpe azalaki kobika na oyo ya motoba.

Mpe Yesu alobaki na ye: “Kende kozwa mobali na yo, mpe bóya awa.”

Mpe alobaki: “Nazali na mobali te.”

26 Alobaki: “Te, ozalaki na bango mitano, mpe oyo ozali kobika ná ye sikawa azali ya yo te. Boye, olobi malamú.”

27 Bótala sikawa, Moyuda yango. Ntango Yesu asalaki likamwisi wana epai na ye, Moyuda wana ya molende mpenza, ya solo-solo, Moyuda ya solo, alobaki: “Yo ozali Mwana na Nzambe, Mokonzi na Yisraele.” Ayebaki ete bilembo wana esengelaki kolanda elongo Masiya.

28 Mpe sikawa tala Mosamalia moko. Ntango likamwisi wana esalemaki likoló na ye, alobaki: “Misie, namoni ete Ozali Mosakoli. Toyebi ete ntango Masiya akoya, Akoyebisa biso makambo oyo. Kasi Yo ozali Nani?”

Alobaki: “Ngai nazali Ye oyo azali koloba na yo.”

29 Atikaki mbeki na ye, mpe akendeki mbangu kati na engumba, mpe alobaki: “Bóya komona Mobali Oyo ayebisi ngai makambo esalaki ngai. Oyo ezali mpenza Masiya te?” Na ntembe te.

30 Na kati na Makomi nyonso tokokaki kozwa yango, lolenge oyo Asalaki makambo oyo Tata azalaki kolakisa Ye. Biblia elobi, kuna na Santu Yoane, ntango batunaki Ye mpo na nini Abikisaki bibósono nyonso wana te, mpe Alobaki: “Solo, solo, nalobi na

bino.” Santu Yoane 5:19: “Solo, solo, nalobi na bino ete, Mwana akoki kosala likambo na Ye moko te; kasi bobele yango emoni Ye Tata kosala, Mwana akosala mpe lokola.”

³¹ Sikawa, soki Klisto asili kosekwa longwa na bakufi, mpe azali katikati na biso lelo, mpe alakaki ete makambo yango moko oyo Ye asalaki, ete biso tokosala yango mpe lokola, to yango ezali Solo, to ezali Solo te. Biblia elobi: “Azali motindo moko lobi, lelo mpe libela.”

³² Mpe, baninga, nazali mpenza na esengo ya koyeba, lelo, ete nandimi solo mpenza, ná nyonso oyo ezali kati na ngai, ete Yesu Klisto azali Mwana na Nzambe. Akumbelamaki zemi mpe abotamaki, na mbotama ezangi litónó. Ye anyokwamaki na nse ya Ponse Pilata; abakamaki na ekulusu, akufaki, akundamaki, asekwaki lisusu mokolo ya misato; mpe amataki na Likoló, mpe afandi na loboko ya mobali ya Nkembo na Ye. Mpe Molimo Mosanto azali awa mpo na kokóba na misala yango moko oyo Ye asalaki ntango Azalaki awa na mokili. Oyo mpenza likanisi moko ya kitoko!

³³ Ntongo kitoko nini oyo, ntongo ya liboso ya lisekwa, Pásika ya liboso oyo etikálá kotána na mabelé! Bozali kososola ete Pásika oyo, oyo tozali kosepela na yango, ya lisekwa na Ye, ezali bobele kotalisa na Pásika monene oyo ezali koya, ngonga oyo Akoya kouta na Likoló? Mpe baoyo nyonso bakufi kati na Klisto bakosekwa mpe bakokende elongo ná Ye. Tozali bobele kotalela yango, Pásika monene oyo ezoya. Mpe, lelo, ezali kitoko mpenza, kobondisama nini oyo, elembeteli nini oyo tozali na yango, ntango Biblia elobi yango, ntango bozali na Ye na-bisika-nyonso elobi yango, ntango Nguya na Ye ya kobikisa elobi yango, ntango Molimo Mosanto na Ye monene alobi yango, ntango biloko nyonso na molóngó elobi yango, Lingomba na Ye elobi yango, motema na ngai elobi yango motema ya moto nyonso oyo abotami mbala ya mibale, elobaka yango, ete: “Yesu Klisto azali Mwana na Nzambe, mpe akoya lisusu! Mpe Azali motindo moko sikawa, ‘Lobi, lelo, mpe libela!’” Sikawa bótala.

³⁴ Ezalaki na ntongo kitoko ya Pásika oyo. Nungunungu ezalaki mingi, masolo. Basi mosusu bazongaki longwa na nkunda, mpe balobaki ete bamonaki emononeli ya Banje. Mpe babanzaki ete ezalaki mokengeli ya elanga; Malia, mama, mpo ayokaki mongongo moko koloba sima na ye, mpe alobaki: “Ozali koluka nani?” Mpe ntango Abalukaki. . .

³⁵ Abalukaki, mpe alobaki, “Balongoli Nkolo na ngai. Nayebi te epai wapi balalisi Ye. Soki Oyebi, yebisa ngai epai wapi Ye azali, mpe nakokende kozwa Ye.”

Abalukaki, mpe alobaki: “Maria.”

³⁶ Mpe atalaki Ye, mpe alobaki, “Raboni,” elingi koloba: “Molakisi!”

³⁷ Alobaki: “Kosimba Ngai te, mpo ete Namati naino te. Kasi nakomata epai na Tata na bino, mpe epai na Tata na Ngai, epai na Nzambe na Ngai, mpe Nzambe na bino. Kasi kende, koyebisa bayekoli na Ngai ete nakokutana na bango na Galilai.”

³⁸ Ndenge likambo yango emonanaki lokola lisolo moko ya mpambálá-mpambala, ya Moto oyo bango bamonaki apakolamaki nkisi ya ebembe; mpe akufaki, mpe akundamaki, mpe oyo ezalaki mokolo ya minei, to mokolo ya misato uta Ye akufaki. Petelo alembaki nzoto, mpe alingaki kokende kolóbo mbisi. Mibale na kati na bango balobaki, moko na nkombo ya Keleopa, alobaki: “Tokozonga na biso kaka na Yelusaleme.” Mpe wana ezalaki bango na nzela, kotambola elongo, ntango Petelo azwaki ndobo na ye, mpo na kokende, kolóbo, baoyo mibale bazalaki na nzela na bango, ná mawa. Mpe wana bazalaki kokende elongo na nzela, balobaki: “Ee, nabanzi bomoi ezali na ntina te kobikela yango. Oh, ndenge mpenza tondimaki ete Azalaki Masiya! Ndenge nini Moto wana, Oyo asekwisaki bakufi, akokaki mpenza kotelema wana mpe kotika nganganzambe mokonzi wana átiola Ye? Ndenge nini Moto wana, Oyo akokaki kozwa emononeli nsima na emononeli, akokaki mpenza kotika sodá moko ya Moroma átia linuká na elongi na Ye, mpe ábeta Ye na motó, mpe áloba: ‘Soki Ozali mosakoli, yebisa biso nani abeti Yo’? Ndenge nini Akokaki kogánga kosénga mawa, na ekulusu, komona ete Akokaki ata kosekwisa bakufi?” Oh, ezalaki mpenza ngonga ya kolemba nzoto!

³⁹ Mpe ba-ntango wana ya kolemba nzoto ekómelaka bandimi nyonso, mpo na komeka yo, mpe kotia yo na epimeli, mpe kotala soki ondimi solosolo mpenza. “Mwana nyonso oyo ayáka epai na Nzambe, asengeli liboso komekama, koyekolisama ya mwana.”

⁴⁰ Bamosusu kati na bino awa na mpokwa oyo, na ntembe te, bakoleka na komekama yango moko wana. Soki tosengeli kobengisa molongo ya mabondeli, nazali na likanisi moko te soki nani nde azali na bakaláti ya mabondeli, moto mosusu mpe te ayebi yango; yango nyonso esangisamaki esika moko, bongo epesamaki na bino. Nakobenga longwa na epai moko boye, oyo nyonso ezali na makanisi na ngai na ntango yango. Tokoki kotelemisa kaka bato moke na mbala moko. bato zomi na mibale mbala mibale to misato, ntango mosusu, nde bakoleka na molongo ya mabondeli. Oyo nyonso akolinga koya. Okoki kokanisa ete Asili koleka yo, kasi Asali yango te. Azali bobele komeka yo, komona kaka soki mpenza okondimela Ye. Emononeli ebikisaka te; emononeli ezali bobele kotatola Bozali na Ye.

⁴¹ Nafandaki kaka awa, nazalaki kotala sikawa na kati ya eyanganelo. Mpe namoni mo—moninga na ngai, Mme Cox, oyo ya kuna na Kentucky. Azalaki na cancer ya monene na elongi na ye, eleki mwa ba-mposu, eliaki mpenza zingazina ya liso na ye.

Azalaki kobunda na liwa. Mme Wood, moninga na ngai malamau, abengaki ngai na telefone, mpe azalaki kolela, alobaki: “Nabanzi ete ekolia liso ya mama, na mwa mikolo oyo.” Monganga asalaki yango likambo moko, ná eloko moko boye, mpe epanzaki yango. Ekomaki mpenza na ndenge moko ya somo. Nakotaki na kati mpe nasalaki libondeli moko ya mwa moke kaka, ná kondima moko ebwaká lóngo, ete yango ekosalema. Mpe tala ye oyo afandi awa na mpokwa oyo, na nzoto kolongonu mpe malamau be; ata litónó na yango etikali te, nyonso ebiki, na elongi na ye. Afandi awa liboso na biso na mpokwa oyo. Bamosusu zingazinga, ná likambo yango moko. Mpo na nini? Ezali mpo Yesu Klisto asekwaki longwa na bakufi, mpe Azali na bomoi.

⁴² Ye moko oyo akokaki kosimba moto na mbala, mpe alobaki: “Nalingi, zala peto,” akoki kosimba cancer mpe koloba, “Nalingi, zala peto,” soki Azali lolenge moko lobi, lelo, mpe libela.

⁴³ Mpe wana Keleopa ná bango bazalaki kotambola elongo na nzela, ná mitema ya kolemba, bazalaki lokola na moko na bantongo wana ya mawa, komonana lokola ete makambo nyonso ezalaki kokende mabe. Mpe na mpwasa, Moto moko abimaki, wana ezalaki Ye koya nsima na bango, apusanaki mpe abelemaki pene ná bango. Mpe bayebaki na bango ata moke te ete oyo wana ezalaki Nkolo Yesu! Azalaki na bomoi, mpe bato mingi oyo balingaki Ye bayebaki yango te.

⁴⁴ Ezali mpe ndenge moko lelo. Ezali na bato mingi lelo, oyo balingaka Nkolo, mpe bazososola te. Okoki koyebisa bango yango, mpe ata bongo bazokoka kososola te ete Azali na bomoi mpo na libela na libela, na mpokwa oyo, ete Azali awa kati na losambo oyo na mpokwa oyo, ete Azali katikati na biso, mpe akozala kino Akoya na nzoto ya komonana, ya mosuni. “Nakotika bino ata moke te, nakosundola bino mpe te.”

⁴⁵ Mpe wana bazalaki kokoba kokende elongo mpe babandaki kosolola elongo na nzela, Yesu, nalingi ete bótala malamau eloko ya liboso Yesu asalaki, akendeke sémba mpenza na Makomi, Alobaki: “Oh, bilema na mitema, ezali mpasi mpo na bino kondima makambo oyo basakoli balobaki?” Mpamba te, Autaki kotuna bango: “Mpo na nini bozali mpenza na mawa?”

⁴⁶ Mpe balobaki: “Ozali nde mopaya? Oyebi te ete Yesu ya Nazarete, Oyo biso tokanisaki ete azalaki Masiya, Mosikoli ya Yisraele, Oyebi te ete oyo ezali kutu mokolo ya misato uta Ye abakamaki na ekulusu? Azalaki Moto na nguya, kati na Liloba. Azalaki Mosakoli na nguya, mpo ete ezali na bikamwiseli ebele mpe makambo oyo, Nzambe asalaki na nzela na Ye. Mpe oyo ezali mokolo ya misato; mpe sikawa basili koboma Ye, mpe bakundi Ye, mpe Azali kati na nkunda. Mpe basi mosusu bayei epai na biso mpe balobi na biso ete Asílaki kosekwa longwa na bakufi.

Mpe toyebaki ete ezalaki na yango nsango moko ya bolema, boye tozali na nzela kozonga na biso.”

⁴⁷ Na ntango wana nde Abandaki kofungola Liloba. Oh, nalingaka Liloba ya Seko ya Nzambe! Abandaki kotambola na kati ya Makomi, kobanda na Mose. Atikaki eloko moko te oyo azangaki kolobela, Akendeki sémba na Liloba!

⁴⁸ Moto nyonso oyo Nzambe atindi, ata azali nani, akokangama ná Liloba na Nzambe. Soki asali bongo te, azali mosali na Nzambe ya solosolo te.

⁴⁹ Akendeki mbala moko na Liloba. Mpe Atalisaki, na nzela ya Liloba, ete Klisto asengelaki kokufa, kosekwa lisusu, mpe kokota na Nkembo na Ye. Sikawa, oh, ndenge mpenza basengelaki kosolola!

⁵⁰ Nakosepela kozala na mwa ngonga moke ya kosolola na Ye (bokosepela te?) elongo na nzela. Okoloba: “Ee, Ndeko Branham, nakolinga mpenza. Nakosepela soki nakokoka.” Ee, tokoki kosala likambo yango sika-sikawa. Ezali Ye nde azosolola ná yo, kati na motema na yo. Ozali kaka nde koyeba yango te.

⁵¹ Sikawa bótala wana Abelemaki pene na engumba, mpokwa ezalaki koya, Asalaki lokola alingaki nde koleka.

⁵² Akoki mpe kosala yango epai na yo. Akoki kosala ete ókanisa ete Alingi kokoba koleka nzela, kasi Akoleka te. Akoleka nzela te. Alingi kaka yo óbengisa Ye.

⁵³ Mpe balobaki na Ye: “Oh, mokolo esili kopusana. Sikawa kokóba te, kasi tosengi ókota mpe óumela elongo na biso.” Yo pesa Ye kaka lolenge wana ya kobengisa, tala likambo oyo ekosalema. Balobaki: “Mokolo esili kopusana mpenza sikoyo, Yo yaka mpe óumela elongo ná biso. Tokomi kokende mpokwa.” Na nsima Abalukaki mpe akotaki, na mwa restaurant yango, mwa esika yango ya kolála.

Na Poto bazalaka naino na yango. Bokolia mpe bokolála, mpe nyonso ekofutama na motuya moko, hotel na bino.

⁵⁴ Mpe ntango Akótaki elongo ná bango! Esika ekomi elengi yango oyo. Mokolo wana mobimba, wana ezalaki bango kosolola ná Ye, Atikálá koloba eloko moko te. Nzokande, batambolaki elongo ná Ye mpe basololaki ná Ye, liboso, kasi bango basósolaki yango te.

⁵⁵ Nani nde abatelaki yo na likama ya motuka wana mokolo mosusu wana? Nani asalaki ete bebe wana áyoka malamumu? Nani afutaki nyongo ya biloko wana na zándó mpo na yo? Ezalaki Ye, kasi ozali na yo kosósola yango te. Nani azali kopesa yo nzoto kolongonu mpo na koya na losambo na mpokwa oyo? Ezali Ye, kasi ozali kososola yango te. Oh, soki tokokaki kaka kosala lokola bango, bobele kobengisa Ye ete ákota!

⁵⁶ Mpe ntango Ye akotaki, akotaki na kati, akangaki bikuke, na nsima Asalaki eloko moko oyo moto mosusu te akokaki kosala

yango ndenge wana. Azalaki bobele Oyo akokaki kosala yango, mpo ete bazalaki elongo ná Ye liboso ya kobakema na Ye na ekulusu. Mpe Azwaki lipa yango, mpe, kaka ndenge Asalaki yango, oyo wana ezalaki lolenge na Ye Moko ya kosala yango. Mpe miso na bango efungwamaki, mpe bayebaki ete ekokaki bobele kozala Ye. Aumelaki na bango ntango molai mpenza te. Alimwaki na miso na bango, kaka na ngonga moko. [Ndeko Branham alelisi misapi na ye—Mok.]

⁵⁷ Mpe na nzela na bango, bazongaki nokinoki mpenza ndenge bakokaki kokende, na makolo pepepe, bobele kogánga na elónga, mpo na koyebisa bango ete: “Nkolo asili kosekwa solo!” Bazongaki te mpo na kowelana likoló ya losambo na bango. Bazongaki te mpo na koswana na ntina na Yango. Kasi bayebaki bobele ete Asilaki kosekwa longwa na bakufi!

⁵⁸ Sikawa, baninga, soki Yesu Klisto, Mwana na Nzambe na bomoi, nsima na mibu nkóto moko na nkama libwa, soki Biblia ezali solo, Alobaki: “Nazali na bomoi libela na libela,” Azali bobele na bomoi awa, na kati ya ndako oyo na mpokwa oyo, ndenge Azalaki mokolo ya lisekwa na Ye, Azali kati na nzoto moko.

⁵⁹ Bamosusu na bango basanganaki elongo. Mpe Ayelaki mpenza koleka kati na bitutú, amonanaki kuna na kati, kati-kati na bango, alobaki: “Ngai oyo, bómama Ngai. Tala bilembo ya mpota na Ngai na maboko na Ngai. Molimo ezalaka nde na mosuni ná mikuwa lokola Nazali na yango?” Alobaki: “Bópesa Ngai eloko ya kolia.” Mpe bapesaki Ye mbisi ná lipa. Atelemaki wana mpe Aliaki yango, liboso na bango, alobaki: “Molimo aliaka te ndenge bozali komona Ngai kolia.”

⁶⁰ Azali nini? Azali Yawe Nzambe monene ya bomoi wana, oyo azali katikati na biso na mpokwa oyo. Azali na kati ya bisika nyonso oyo bato mibale to misato basangani: “Nakozala kati na bango.”

⁶¹ Mpe sikawa tala likambo oyo ngai nazokanisa. Soki Klisto akoya na kati ya eyanganelo ya bato oyo, wana bozali kotoka, kozela, mpe akotalisa polele, na Pásika oyo, ete Azali na bomoi, mpe Atelemi kati na ndako oyo na mpokwa oyo, boye bozali na ndingisa ya kosenga Ye eloko nyonso oyo Ye akufelaki, mpe kondima ete bokozwa yango. Bondimi ete yango ezali Solo? Na ntembe te, ezali bongo.

⁶² Sikawa, nakoki kosolola na bino ntango molai, kasi Liloba moko kouta na Klisto ekozala na ntina koleka maloba nyonso oyo nakokaki koloba; nalembi mpe mongongo eziki, kolemba kaka ndenge mongongo elembi.

⁶³ Na bongo likambo mosusu, ya koloba. Ezali mpasi, mpamba te oyo ezali engumba na ngai, mpo na kosala liyangani na elonga nyonso ná kopakolama ya Molimo ndenge wana. Mpo na nini? Mpo oyo ezali mboka na ngai. Yesu alobaki ete: “Mosakoli,

na ndako na ye moko, na ekólo na ye moko, ata na etúká na ye moko.” Ezali kaka eloko moko oyo ekomaka na yango ndenge wana.

⁶⁴ Balobaki ete ntango Akendaki na mboka na Ye Moko, balobaki: “Oyo mwana ya mosali-mabaya te? Oyo nde mama na Ye te, Maria, oyo azalaka awa ná biso elongo? Bandeko na Ye nyonso ya mibali bazali awa, ná bandeko na Ye ya basi, boye te? Toyebi bango te? Eteyelo nini nde Ye abimelaki na yango? Na seminaire nini Ye azuaki diplome? Azali na mikanda nini ya kotatola Ye?” Mpe Autaki na eteyelo moko te to na seminaire moko te, to mikanda moko ya komindimisa, kasi Autaki longwa na Nzambe. Kasi bakokaki komona yango te. Balobaki: “Wapi nde Azwi bwanya oyo?”

⁶⁵ Mpe ntango bamonaki Ye kosósola makanisi ya bato yango, ntango Petelo ayaki epai na Ye, Alobaki: “Nkombo na yo Simona, nkombo ya tata na yo ezali Yona,” Esukisaki ye solo. Ndenge nini Ayebaki ye?

⁶⁶ Bafalisai batelemaki wana, mpe balobaki: “Azali Bezezebula. Azali Mokonzi ya bato na solóka. Azali zaboló!”

⁶⁷ Mpe Yesu alobaki: “Bozoloba yango mpo na kotemela Ngai, Mwana na moto, ekolimbisamela bino. Kasi ntango Molimo Mosanto akoya mpe akosala makambo yango moko, mpe bolobi liloba moko mpo na kotemela Yango, ekolimbisamela bino ata moke te, na mokili oyo to na mokili ekoya.” Na bongo, ezali likambo moko ya somo. Na bongo Ayebaki ndenge nini? Mpo na nini Alobaki yango? Ayebaki ete bilembo yango ekosuka kino na mokolo ya súka oyo.

⁶⁸ Mpe na mikolo oyo ya súka, Akozala sembo te, mpo na kosopa nkanda na Ye likoló na bato sembo. Bazali. . . Tosili kotiama na emekeli, mpe tozwami na kozanga bozito. Nyonso oyo tozali kokanisa ezali ntango ya bisengo, manáka ya radio, oyo ezangi bokóndé, Elvis Presley, Arthur Godfrey, maseki ya kala ya bosoto, bato ya koyebana na radio mpe na televizió. Tokotikala na ndako mokolo ya Misato na mpokwa, kozangisa liyangani ya mabondeli, mpo na komona makambo ya bosoto ya ndenge wana, mpe tozomibenga biso moko Baklisto?

⁶⁹ Na nsima ntango Nzambe asopi Molimo na Ye, mpe alakisi bilembo ya lisekwa na Ye, tokweisi Yango mpe toboyi. Mpe kosala likambo wana ezali lisumu oyo ekolimbisama te. Yesu alobaki: “Koloba bobele liloba moko mpo na kotemela Yango, ekolimbisama ata moke te, ézala na mokili oyo to na mokili oyo ekoya.” Boye Molimo yango asengeli koya na mikolo oyo na suka, mpo na kondimisa ete Liloba na Nzambe ezali solo.

⁷⁰ Mpe nazali koloba, na nsé na bokonzi ya Liloba na Nzambe, mpe na eyokeli ya elimo na ngai moko: Molimo Mosanto moko wana (Molimo) ezali mpenza awa sikawa katikati na bato oyo. Sikawa, nalobaki ete Asili kosekwa longwa na bakufi. Nalobaki

ete Azali na bomoi, na bomoi libela na libela. Nalobaki ete Azali ndenge moko lobi, lelo mpe libela; ndenge moko na makambo, ndenge moko na Nguya; ndenge moko na makambo nyonso, nyonso longola kaka nzoto na Ye ya mosuni oyo efandi na loboko ya mobali ya Nzambe ná Lokumu, kati na Nkembo. Kasi Molimo Mosanto azali awa, azosala mosala, kotambola, kokokisa makambo, kosala mpenza-mpenza ndenge Yesu Klisto asalaki, mpamba te ezali etaliseli ya lisekwa na Ye. Ngonga kitoko nini oyo! Sikawa nabanzi ete bomoni epai oyo ngai natelemi.

⁷¹ Sikawa, ezali kaka te na mwa ndambo na bato oyo, pene na nkama moko, to nkama mibale ya bato awa kati na—kati na mwa ndako oyo, bafinani awa na mpokwa oyo, kasi nalobaki likambo yango liboso na ba-nkoto mbala nkoto na nkoto, mpe ba-nkama nkoto na nkoto, Nasimbaki Biblia na loboko moko, mpe Koran na loboko mosusu, nalobaki: “moko ezali solo, mpe mosusu ezali lokuta,” Mpe nabeti móndengé na nganganzambe ya Mizilma nyonso áya mpe átalisa polele, to mosusu nyonso, Boudha, to ézala ata nini, mpo na kotelemela Koran, mpe kotelemela losambo na bango, kasi bango nyonso bafandi kimia.

⁷² Kasi, bandeko, ntina oyo nasalaka bongo, ezali mpo nayebi ete Mosikoli na ngai azali na bomoi! Mpe Azali Solo. Yesu Klisto azali na bomoi. Azali awa!

⁷³ Sikawa ezali eloko moko te kati na ngai moko oyo ngai nakokaki kosala, ezali likabo ya Nzambe. “Okosala yango ndenge nini?” Ezali kaka komitika yo moko.

⁷⁴ Kaka awa na ndako oyo sikawa ezali na ebele, na ebele na Banje. Okoloba: “Wana ezali Likomi?” Wana ezali Biblia. Tika nátalisa bino. Baklisto boni bazali awa? Bótombola maboko. Malamu, bokoki kokitisa yango. Biblia elobi ete: “Banje na Nzambe bazali kozingela baoyo nyonso bazali kobanga Ye.” Na bongo Banje bazali awa!

⁷⁵ Bongo Klisto alobaki: “Esika bato mibale to misato basangani na Nkombo na Ngai, Nakozala kati na bango.” Na bongo, Azali awa! Likambo sé moko ezali ete, bokoki komona Ye te, kasi na nzela na kondima biso tondimi yango.

⁷⁶ Nakoki kotalisa bino polele ete radio mpe ezali koleka awa, mingongo. Nakoki kotalisa bino polele ete bilili ezali koleka awa. Ekobeta na elekelo *oyo* awa te; ekobeta na *oyo* te, crystal oyo, na micro oyo; ekoya mpe te na nzela ya eloko ya kosalela *oyo*, mpamba te esalemá lolenge wana te. Kasi ezali na eloko ya kosalela oyo ekobimisa elili wana.

⁷⁷ Mpe Nzambe atii bamoko kati na Lingomba, ya liboso bantoma, bongo basakoli, balakisi, bapalanganisi Nsango-malamu, mpe bakengeli, nyonso mpo na kobonga be ya Lingomba. Ndenge nini tokoki koboya moko, mpe koloba ete oyo mosusu ezali bongo te? Nzambe asalaka yango, Ye moko.

Ezali na eloko moko te na mokili bobele komitika na Molimo Mosanto. Mpe Molimo Mosanto akokonza kolongwa wana, mpe okoyeba te oyo yo ozali kosala. Ezali mosala ya bonsómi ya Molimo Mosanto.

⁷⁸ Sikawa, bino baninga, ya engumba na ngai. Mpe nalingi koloba likambo oyo sikawa, liboso ya kosukisa liyanagani ya kolamuka oyo. Moko na mikolo oyo ata putulú ya móto ekotikala te na Jeffersonville, ekotikala ata moko te na Charlestown, ata moko te ekotikala na Louisville. Mokili oyo esili kotela mpo na kosambisama. Bazali na bombe hydrogene moko sikawa oyo Russie akoki kobwaka longwa na Moscou, kokweisa yango na Balabala ya Minei, mpe kolongola ba usines nyonso oyo ya masasi zingazinga awa, mpe kozindisa yango na bozindo ya metre ntuku mibale na misato na nsé ya mabele, ná bombe moko. Bombe moko; bonene ya ba-kilometres ntuku mibale na minei na zingazinga, ekokende na nsé ya mabelé na bozindó ya b metre ntuku minei na mitano. Loboko esili kotiamana na esika ya kobetela masasi yango. Sáa ezali kokóba kokende liboso. Ntango esili kokóma mosika koleka ndenge bokanisi. Mpo na nini kozela kino na ntango wana?

⁷⁹ Bóbosana te: “Soki mongombo oyo ya mabelé ebebisami, tozali na mosusu oyo ezali kozela.” Bóbanga ba-bombe ya hydrogene te eloko mosusu te. Ntango nyonso oyo ozali na Klisto kati na motema na yo, yango nde ebombelo ya bombe ya malamuko koleka oyo ngai nayebi. Esalemi uta na nsálá; na nsé ya mapapu na Ye, nde yo ozali koumela. Boye kotungisama te mpo na makambo wana, soki ozali Moklisto.

⁸⁰ Kasi soki ozali Moklisto te, na ntembe te otelemi na esika moko ya nsómo. Oyebi te na miniti nini motema na yo ekotika kobeta. Biblia elobi ete bato bakokufa na mikolo ya suka, ná bokono ya motema, “Mitema ya bato ezali kokweya, kobánga, yikiyiki na ntango, nsómo kati na bikolo.” Bótala eloko mosusu ya koleka, mibali bazali kokufa mbala zomi, koleka basi; Biblia etikálá koloba te ete mitema ya basi ekokweya, Elobaki: “Mitema ya mibali nde ekozala kokweya-kweya.” Ezali mpenza solo, ya kobonga be mpenza.

⁸¹ Mokolo mosusu na Oakland, mwasi na ngai ná ngai tozalaki kuna na San Francisco, koningana monene ya mabelé wana esalemaki. Mpe mabelé ebandaki kobaluka mpe kotengatenga kuna, kino bandako eninganaki, mpe bibimelo-milinga ya bandako ezalaki kokwea. Maboké minene ya mopepe emataki likolo ndenge wana, ná molinga kati na yango, to molinga ya moindo, ata soko ezalaki nini, longwa na bisika wana. Mpe bato bazalaki kokima na ba-balabala, kogángáká. Nakanisaki: “Ekozala ndenge nini ntango Nkolo akomonana mpenza?” Bisika ya koteka masanga, ekobaki na yango, kotiáká masanga na bango, likoló na bitáláká, mpe kotekáká yango. Bato bazalaki

koya na bango kosóm̄ba yango. Moto yango akokaki kotéka yango te soki moto ya kosóm̄ba yango azalaki te. Ezali solo.

⁸² Ezali, biso nde tokweisami. Tika nayebisa bino, ndeko mobali. Nazali americain, mpe nalingaka ekólo na ngai. Kasi mobange ya ekolo oyo esili kotiama na emekeli, mpe ezwami na kozanga bozitó. Ezali kozinda, kaka ndenge nayebi ete nazali motei nsima ya eteyelo oyo na mpokwa oyo. Sikawa nazoloba yango mpo na nándimama na miso na Nzambe. Nazoloba yango mpo Nzambe atii yango na motema na ngai náloba yango. Mpe eloko ya malamú koleka mpo na yo kosala, ezali komilengela mpo na Boyei na Nkolo.

⁸³ Sikawa bóndima Ye, bózala na kondima na Ye. Sikawa, maloba nyonso nakokaki koloba, nakoloba lisusu, ekozala na ntina moko te liboso na oyo Yesu akokaki koloba. Kasi bozali kososola epai wapi natelemi, elongo ná etonga ya bato oyo na mpokwa oyo? To nalimbolaki mabe, nalimbolaki mabe eloko moko, to nalobaki Solo. Sikawa soki Yesu Klisto asili kosekwa longwa na bakufi, mpe, alakaki ete, makambo moko oyo Ye asalaki biso tokosala mpe lokola, mpe nasengaki, uta nazalaki bebe moke ya mobali . . .

⁸⁴ Nazalaki naino na sánzá zomi na mwambe te, nabanzi, kasi mibu koleka mibale te, ata bongo, ntango namonaki emononeli na ngai ya liboso. Ezalaka bongo, bomoi na ngai mobimba. Bato awa na tabernacle, bayebi yango. Na ntango nyonso oyo nazalaka awa, ata mbala moko te etikálá kozánga kosalema. Mpe ekotikálá kozánga kosalama ata moke te, mpamba te ezali Nzambe. Ekendá zingazinga na mokili mobimba, móto ya kolamuka ya monene moko esili kopela. Mpe sikawa, na ngolu na Nzambe, nazali na motango na ngai ya milió ya mibale ya milimo, kaka na mayangani na ngai moko, baoyo nalóngi mpo na Nkolo Yesu. Milió ya mibale, ezali solo. Mpe bókanisa naino ba-milió mosusu oyo elandaki, Oral Roberts, ba-ndemo nyonso ya moto oyo epelaki longwa na likambo yango, mpe ekobaki, ba-nkoto mbala nkoto na nkoto, na lolenge ete na mokili mobimba, kolamuka monene moko ya Nguya na Nzambe, ezali kosalema. Mpe zabolo azali kofungola makambo ya lokuta ya ndenge na ndenge nyonso, mpo na kotelemela Yango. Kasi Liloba na Nzambe ya solosolo mpenza, ekokende semba kino súka. Ekotikala kokweia ata moke te! “Ngai Yawe nalónaki yango. Nakomwangisela yango máí butu mpe moi, mpo moto moko te ábótola yango na loboko na Ngai.”

⁸⁵ Sikawa, na mpokwa oyo, nalobaki ete Klisto asekwaki longwa na bakufi. Azali motindo moko lobi, lelo mpe libela. Sikawa, Nkolo ápambola bino. Soki Akosala yango, boye bozali . . . Soki bondimi yango, Nzambe ápambola bino. Bósenga Ye, na bongo, ntango Akokóta na mosala. Soki Klisto akomonana awa na etumbelo oyo! Móndengé yango oyo. Soki Yesu Klisto, Mwana na Nzambe, akomonana awa kaka na etumbelo, mpo

na kosala makambo moko oyo Asalaki ntango Azalaki awa na mokili, bokondima Ye?

⁸⁶ Bótala Ye, na nzela ya Emau, ndenge bana mibali yango, abukaki. . . Ntango Abukaki lipa yango, Asalaki likambo moko kuna oyo moto mosusu te akokaki kosala. Ezalaki eloko moko oyo kaka Klisto nde akokaki kosala. Mpe bayebaki yango.

⁸⁷ Sikawa, soki Akosala likambo yango moko awa, oyo kaka Klisto nde akoki kosala; eloko moko ya lokuta te, kasi likambo yango moko oyo Ye asalaki; na bongo bódima Ye, bóyamba Ye, bózala na kondima kati na Ye, bólinga Ye, bósalela Ye.

⁸⁸ Bótika nayebisa bino, bómibakisa na lingomba sikawa te. Yango ekosunga te. Bosengeli kobotama mbala ya mibale. Ezali te likambo ya komisalela eyokeli ya nzoto; ezali te mwa likambo moko olobaki: “Ee, nagángáki. Nalobaki na minoko ya sika. Nasalaki *boye*,” ezali yango te. Na ntango oyo mpenza, na nsé ya motema na yo, Eloko moko eyei kobongola yo, mpe okómi ekelamu ya sika kati na Klisto Yesu; oyambi nde Moto yango, Klisto Yesu; ntango makambo ya kala ekufi, mpe makambo ya sika ebotami lisusu; obongisi makambo alima, makambo oyo osalaki mabe; ozolinga banguna na yo, ozobondela mpo na baoyo bazali konyokola yo; na ntango wana nde yo ozali Moklisto. Nzete eyebanaka na mbuma oyo yango ebótaka.

⁸⁹ Tika ete Nkolo ápambola bino sikawa, wana togumbi mitó. Nakosenga ndeko mwasi ete ákende na piano, na malembe ábeta “Monganga monene azali penepene, Yesu moyokeli mawa.” Mpe bino baoyo bozali libanda, sikawa, baoyo bozali na ba-kaláti ya mabondeli, bóbelema na ekuke, tokobanda kala mingi te. Tóbondela.

⁹⁰ Tata na biso na Likoló Mopambolami. Oh, mongongo na ngai ya mpasi, sánzá minei ya kolobáká, nalembi mpenza na kati ya mongongo na ngai. Kasi nabondeli ete Ósunga ngai sikawa. Esika oyo ekozala libanga mosusu ya litomba na Branham Tabernacle. Esika oyo ekozala litatoli mosusu oyo ekotelema na mikolo ya súka, na Mokolo ya Kosambisama. Mingi batelemi na kati mpe na libanda, na mpokwa oyo, mingi kati na bango bazali komituna, mingi bazali kokanisa: “Ezali solo, to ezali solo te?”

⁹¹ E Tata na Seko mpe Mopambolami, tobondeli ete Ótalisa sikawa bolingo na Yo epai na biso, na komonana awa mpe kokómisa Liloba na Yo sólo. Nasololi na ntina na Liloba na Yo, ndenge Yo osalaki, Yo moko, epai na Keleopa ná moninga na ye, na Emau. Mpe na nzela na biso, Nkolo, wana tozali kokende, Ozali kosolola na biso na nzela ya Liloba na Yo. Mpe sikawa yaka katikati na biso! O Klisto Monene, yaka katikati na biso, talisa polele ete Liloba na Yo ezali solo, mpe tika ete ómonisa polele Bozali na Yo awa na mpokwa oyo. Wana biso bikelamu ya babola oyo balongobani te, tozoyambola ete tozali basumuki mpe tolongobani na makambo oyo te, kasi tondimi yango, Nkolo.

Mpe na ngolu, toyambi yango, na nzela ya kondima, ete tosili kobikisama, mpe tozali bana na Yo. Pambola biso sikawa, Nkolo.

⁹² Nayebi ete Liloba na Yo ezali solo, ntango Olobaki na ntina na “mosakoli na engumba na ye moko, katikati na bato na ye moko.” Kasi, Nkolo, nabondeli, kaka mpo na mpokwa oyo, ete Óbwaka miso epai na bato, mpe ómimonisa Yo moko mbala moko lisusu awa na engumba oyo, na nzela ya mosala ya Molimo Mosanto. O Nzambe na Seko, pambola biso sikawa wana tozali kotalela Yo. Mpe sala makambo oyo Osalaki liboso na Yo kobakema na ekulusu, mpe Jeffersonville ekozala na eloko ata moko te ya komilelela. Kasi, toyebi ete bakokoka kokima te na Mokolo wana, ete Osili komimonisa Yo moko. Nabondeli, na Nkombo na Yesu. Amen.

⁹³ [Maloba mazangi na eteni oyo ya bande—Mok.] . . ezali te oyo ye alingi nábondela mpo na yango. Te, ezali cancer te, mpo asili kobikisama na yango. Kasi alingi ngai nábondela mpo na mpasi ya mokongo oyo azali na yango. Ezali solo. Ezali mpasi na mokongo na ye. Ezali solo? Sikawa ondimi ete Asekwaki longwa na bakufi? Sikawa bótala malamumu. Soki nasololi na ye mwa ntango molai, ntango mosusu eloko mosusu ekolobama. Nayebi te. Sikawa, nazalaki na likanisi moko te ya oyo mpasi na yo ezali. Nayebi te sikawa soki ezalaki nini. Bomoni? Kasi masini ya kotia maloba na bande esili kokamata yango, bokoki koyoka oyo Ye alobaki.

⁹⁴ Tósolola mwa miniti molai koleka, mpe tótala soki Akoyebisa ngai likambo mosusu. Namoni mwasi oyo azomonana lokola eloko moko na lolenge. . . Ezali mwasi mosusu, mpe azali kobondela mpo na ye. Azali na esika moko lokola esika ya bato ya mabomá to na lopitalo moko, ezali lokola. . . ezali esika ya bato ya bokono ya motó. Ezali Madison, Indiana. Ezali—ezali nde—ezali nde—ndeko moko ya mwasi oyo yo ozali na bosenga ya mabondeli mpo na ye, ezali na esika ya bato ya maboma. Mpe soki okondima na motema na yo mobimba, mpe nyonso oyo ezali kati na yo, Nzambe akokangola mpe akobikisa mpasi na yo ya mokongo mpe akokomisa yo malamumu. Ondimi yango sikawa? Malamumu, yaka awa.

⁹⁵ Molingami Tata na Likoló, tobondeli ete na Nkombo na Yesu Klisto, ete Yo óbikisa mwasi oyo, mpe ókomisa ye malamumu. Mpe kokisa lipamboli oyo epai na ye. Mpe nabondeli ete mawa na Nzambe ézala likoló na ye, óbikisa ye mpe ózwa nkembo mpo na Yo moko. Nabondeli na Nkombo na Yesu Klisto. Amen.

⁹⁶ Nakoki koloba boye. Ezali na koningana moko kouta kuna, longwa kaka na sima *awa*. Zela moke, telema awa kaka miniti moko. Namoni ete Pole wana etiki yo. Ezali na bato mingi mpenza, ebele na bato batondi zingazinga na ngai awa. Moto nyonso azali kobénda-benda. kasi nazali komona Yango koya epai na yo. Ezali moto moko oyo. . . Ozali na—ozali na lipaso

moko ya bokono ya basi ezali kozéla yo. Ezali solo. Nazali komona bato mibale to misato bazali komonana, mpe Pole ezongi mbala moko na sima kuna mpe ebeti moto oyo atele mi na nsima kuna. Ezali bango nde bazali kobondela mpo na yango. Bomoni? Ezali solo. Mpe ozali na, ezali nde lolenge ya mwasi moko oyo azali na lipaso mpo na bokono ya basi. Ya solo. Sikawa kende mpe zwá lobiko na yo, mpe Nkolo Nzambe abikisi yo. Amen.

⁹⁷ Okolinga koya? Mwasi, ondimi Nkolo Yesu? [Ndeko mwasi alobi: “Iyo, misié.”—Mok.] Ondimi ete Asekwaki longwa na bakufi? Sikawa, na oyo etali koyeba yo, nayebi yo te. Ekoki kozala ete namóná yo na zingazinga awa. Nayebi te. Bato bayáka mpe bakendeke na bango, nazalaka awa na tabernacle mpenza mingi te mpo na koyeba. Kasi, yo, ozalaka na engumba oyo? [“Iyo.”] Ozalaka na engumba oyo. Malamu, na bongo, kasi nayebi yo te. Kasi Klisto ayebi yo. Kasi soki Amonisi ngai, wana natele mi awa, ntina oyo oyeli awa, okondima yango mpe okoyamba yango? Mpe oyebi ete nayebi ntina oyo oyeli awa te, nazali na likanisi moko te. Eloko moko kaka, ekoki kozala ete omóná ngai na engumba oyo, to eloko moko, to, to eloko moko. Nayebi te. Oyo wana etali Nzambe mpo—mpo na koyeba yango.

⁹⁸ Kuna na sima, olingi mpasi wana ya misopó oyo ezali kotungisa yo éсила? Ondimi ete Nkolo Yesu akobikisa yo? Soki ondimi yango, okoki kozwa yango.

⁹⁹ Mosusu azali na ba-cellule blanc ya kokoka te, ofandi na sima kuna, namoni bango kozwa yango. Ondimi ete Nkolo akobikisa yo? Malamu. Ondimi na motema na yo mobimba? Boye okoki kozwa lobiko na yo ya nzoto, na boye Nzambe abikisi yo. Osimbi Ye. Osimbi ngai ata moke te, ozwami na ntáka ya metre libwa mosika na ngai. Amen.

¹⁰⁰ Sikawa ondimi ete Asili kosekwa longwa na bakufi? Tala kaka, mpe bika, sikawa wana molongo ezali kopusana. Oh, ezali mpenza mpasi awa na Jeffersonville! Bomoni? Mpe ebele na bato ya lolenge oyo zingazinga na yo, bato nyonso! Yesu akamataki moto moko na loboko, mpe akambaki ye libanda na engumba, na ngonga moko.

¹⁰¹ Sikawa, tala ngambo oyo, ndeko mwasi, mwa ngonga moke. Ndimi ete Nkolo Yesu azali awa mpo na kosunga yo. Ozali kotungisama na mpasi oyo ezali na súka ya mosopó, mpe monganga moko asili kotála-tala yo malam. Mpe ayebisaki yo ete ezali mpótá ya libumu. Namoni yo mpe ozali komeka kotambola na ndako, mpe ozali kokende mpenza malembe. Ozali na mingai. Ezali YANGO ELOBI NKOLO. Monganga alobaki ete osengeli koleka na lipaso. Ezali mpenza ya solo. Mpe namoni ye kotia linzáka na mwa kaláti wana kuna na biro na ye: Rebekah Barker, 509 Graham Street. Ezali mpenza solo. Ezali na esika na ye ya mosala, na ebombelo ya makambo. Ezali solo. Ondimi? [Ndeko mwasi alobi: “Iyo, misié.”—Mok.] Na bongo okoki kozwa

lobiko na nzoto na yo. Na, Nkombo na Nkolo Yesu Klisto, tika ete mwasi oyo ázwa lobiko na nzoto na ye. Amen. Nzambe ápambola yo, madame. Kende, ndima sikawa. Zalá na kondima kati na Nzambe.

Soki bokoki bobele kososola Bozali na Nkolo!

¹⁰² Sikawa, mwasi oyo ateleme awa, mpo okoki. . . nayebi yo te, na boyebi na ngai mpenza. Oyebi ngai te, ngai mpe nayebi yo te. Ezali solo? Malamu. Na bongo ozali moto oyo ayebi ngai te, mpe ngai nayebi bango te. Mpe nayebaki mwasi ayosusu yango te. Kasi mwasi oyo azali mpenza mopaya, na ndenge oyo nayebi. Soki ezali bongo, tombola loboko, madame. Mbala na biso ya liboso, ya kokutana mpenza na bomoi.

¹⁰³ Bótala mwasi moko ná mobali moko. Elilingi kitoko ya Santu Yoane 4, epai wapi mwasi moko ná mobali moko bakutanaki; mpe mwasi yango azalaki Mosamalia, Yesu azalaki Moyuda. Mpe babandaki kosolola, moko na mosusu, mpe Yesu amonisaki sekele ya motema na ye mpe ayebisaki ye epai wapi kpókoso na ye ezalaki. Sikawa, soki Ye azali bobele Yesu yango moko lelo, Akoki kosala mosala yango moko lelo.

¹⁰⁴ Soki mwasi oyo akoki kotómbola loboko na ye epai na Nzambe, mpo na kokata ndai te (mpamba te, biso tondimaka kosala bongo te), auti kotómbola loboko na ye na bosémbo, elongo ná oyo ya ngai, ete totikálá komonana liboso te, mpe toyebani na eloko moko te. Okoki kotómbola loboko, madame? Yango mpenza. Amóná ngai te, to namóná ye liboso te, mpe azali mpenza mopaya. Sikawa soki ezali. . .

¹⁰⁵ Bozali ya Nkolo Yesu ezali awa. Soki mwasi yango azali kobéla, nakokoka kobikisa ye te. Asilaki kobikisama; Klisto abikisaki ye ntango Akufaki mpo na ye. Bondimi yango? Kasi soki Ázalaka ya kotelema awa sikawa, ná. . . na esika oyo ngai natelemi, mpe Alingaki, akokaki komonisa ye yango, to kosala likambo moko mpo na komatisa kondima na ye mpo ékoma na esika yango! Sikawa, akoki kozala awa mpo na likambo ya mbongo. Akoki kozala ateleme awa mpo na kpókoso ya libota. Akoki kozala ateleme awa, kobundáká na liwa ná bokono ya cancer. Akoki kozala ateleme awa ná bokono ya Tuberculose. Nayebi te. Nakoki koyebisa bino te.

¹⁰⁶ Mpe sikawa soki bolingi komitia na esika na ngai, bóya awa mpo na kozwa esika na ngai, boyei malamumu. [Ndeko Branham apemi—Mok.] Na ntembe te. Nayebi mpe te, nakosala yango mpe te. Kasi Nzambe ya Lola ayebi. Bokoki kosósola sikawa?

¹⁰⁷ Mpe soki Klisto akosala likambo yango moko awa, Solo oyo ekokwea te, lokola Asili kosekwa longwa na bakufi, mpe alakisi polele ete Azali Yesu yango moko oyo asololaki na mwasi na liziba, bato boni awa bakoloba: “Nakoyamba Ye sikawa mpenza lokola Mobikisi na ngai, to eloko nyonso oyo nazali na yango

bosenga”? Tombola loboko, lobá: “Nakoyamba Ye soki Akosala yango.”

¹⁰⁸ Mwasi oyo atomboli maboko na ye, totikalá kokutana te. Tika ete Nkolo asala yango, nde libondeli na ngai. Sikawa mwasi yango amonani lokola azokende mosika na ngai; soki eyanganelo bakoki kosimba mongongo na ngai. Namoni moto moko ateleme. Ezali mpo na ye moko te, mpenza mpenza. Azali kobondela mpo na moto mosusu, mpe ezali mwasi moko ya mokóló. Ezali mama na ye, azali kobondela mpo na ye. Ezali solo. Azali na mwa bokono ya motema, lokola motema kobeta-beta, noki noki. Azokoka kolala na butu te. Ezali bongo te? Tombola loboko soki ezali ya solo. Mpe mwasi yango azali moto ya ekólo oyo te. Mwasi yango auti mosika na awa. Mwasi yango auti na Georgie. Ezali mpenza bongo. Mpe outi na Georgie. Olingi mpe libondeli mpo na liso na yo. Miso na yo ezali kokende na kokufa. Mpe ezali solo. Ondimi ete Nzambe akobikisa yo? Soki ezali ya solo, tombola loboko. Malamu.

¹⁰⁹ Sikawa, bondimi? Sikawa bózala na kondima epai na Nzambe. Wana nazali kobondela mpo na ye, bondela mpo na yo moko kuna, mpe ndima Nzambe. Azali awa, oyo-na-bisika-nyonso.

Yaka awa, ndeko mwasi.

¹¹⁰ Mobikisi Mopambolami, nazali kobondela ete na Nkombo ya Klisto, Ópesa na mwasi oyo bosenga na ye. Tika ete Nguya ya Nzambe na Nguya-nyonso ézala likolo na ye, mpe ete ábikisama mpe ázwa nyonso oyo azali na bosenga na yango. Nabondeli lipamboli oyo na Nkombo na Yesu. Amen.

¹¹¹ Sikawa kende, na kosepela mpe na esengo. Mpe ndima, ndeko mwasi, mpe kómá malamú. Malamu.

¹¹² Nayebi malamú mpenza te, kasi nandimi ete nayebi mwasi oyo. Nabanzi ete outi na Georgetown, mpamba te nazali. . . Ozali na bondeko ná Ndeko Arganbright te? Na ntembe te, sikawa epakweli oyo, ezali ndenge mosusu. Bososoli ete bokesení ezali sika-sikawa. Soki nasololi na yo esika mosusu; ekeseni sikoyo mpenza. Oyokaki lokola eyokeli moko ya malamú mingi. Ezali Molimo Mosanto. Ozali awa mpo na yo moko te. Oyei awa mpo na moto mosusu, mpe ezali nde mwana mwasi moko ya mibu pene na minei to mitano. Azali na mpasi na mbuma ya mokongo, mpe afandaka na ngambo ya nordi ya Indiana. Ezali solo. Eloko oyo ozali na yango na loboko, tindela ye yango, mpe akobika. Ndimá na motema na yo mobimba sikawa, mpe zwá oyo osengaki, na Nkombo na Klisto.

“Soki okoki kondima, nyonso ekoki kosalema!”

¹¹³ Tala mwasi oyo azali mopaya epai na ngai. Nayebi yo te, namóná yo naino te na bomoi na ngai. Tozali bapaya moko na mosusu, mbula ebele ya kokesene; ntango mosusu ebele,

tobotami na ntáka ya ba-kilometre ebele mosika. Nayebi yo te, namóná yo naino te. Kasi Yesu Klisto ayebi yo.

¹¹⁴ Eloko moko esalemi na kati ya eyanganelo; mobali moko amonani liboso na ngai. Ye oyo afandi, bobele awa, motolú epasuki. Ondimi, misié? [Ndeko mobali alobi: “Iyo.”—Mok.] Na bongo Klisto abikisi yo mpe apesi yo nzoto kolongonu! Amen.

¹¹⁵ Wana nde lolenge ya kosala yango, bóndima! Asimbi nini? Namóná naino mobali yango te; kasi abikisamaki kaka wana. Asimbaki Nkolo Yesu Oyo azali awa. Bólongola kozanga kondima wana kati na bino! Bóbosana ngai lokola William Branham. Bótala Yesu Klisto, Ye nde Oyo azali awa. Nabeti mondenge na kondima na bino, na Nkombo na Klisto, bóbosana ngai; mpe bóndima ete oyo ezali nde Nkolo Yesu awa, mpe bómona eloko nini ekokoma. Etali Ngai te epai oyo ozali kati na losambo.

¹¹⁶ Sikawa tala mwasi moke oyo. Natikalá komona ye te. Azali mokóló koleka ngai. Ye, nayebi te nani ye azali, epai wapi auti, eloko moko te na ntina na ye. Nazali mobimba mpenza mopaya epai na ye. Kasi Klisto ayebi ye.

¹¹⁷ Soki Amonisi ngai ntina oyo yo ozali awa, okoyamba yango mpe okondima yango? [Ndeko mwasi alobi: “Na ntembe te.”—Mok.] Omiyokaki ndenge mosusu eleki mwa miníti, ntango nalobaki likambo moko, boye te? Ezalaki ndeko na yo ya mwasi oyo azali na esika ya bato ya bokono ya liboma na Madison, Indiana. Ezali mpenza bongo. Mpamba te, mwasi mosusu atelemaki awa, mpe yo otelemaki wana ozali kotala na ngámbo oyo. Mpe emononeli yango, ozalaki kondima ntango oyaki. Ezali mpenza bongo. Yango nde esali yango. Mpe ntina oyo ozali awa na mpokwa oyo, ezali mpo ete ozwaki mpasi ya motema. Outi mpenza kozwa bokono ya motema. Ezali mpenza bongo. Mpe namoni sikawa, wana nazali kotala kati na emononeli, mabele wana ezalaki kobaluka. Outi na esika moko awa na Indiana ya súdi. Outi pene na Corydon, wana nde epai outi. Zóngá na ndako, ozali nzoto kolongonu. Yesu Klisto abikisi yo. Yango ezali YANGO ELOBI MOLIMO MOSANTO.

¹¹⁸ Zala na kondima, mpe ndima. Kotia ntembe te. Ndimá kaka. Okoki kosósola bozali-na-bisika-nyonso ya Yesu Klisto? Ezali mpenza kokamwa! Likambo ezali nini?

¹¹⁹ Awa na litúmu oyo, namoni emononeli. Monganga ayebi te soki ezali bokono ya cancer to ya Tuberculose. Ezali solo. Kasi soki ondimi yango, osili kobikisama, ata bongo. Kondima na yo ebikisi yo. Koba kokende liboso.

¹²⁰ Yango wana mpenza. Bozali-na-bisika-nyonso ya Nzambe na bomoi! Nabeti móndengé na kondima na bino. “Soki bokoki kondima!” Sikawa, Asili kosekwa longwa na bakufi. Azali awa elongo ná biso. Ezali Ye! Yango nde makambo mpenza oyo Asalaki ntango Azalaki awa na mokili. Mibu nkoto mibale esili

koleka, Azali naino na bomoi, mpe Azali na bomoi libela na libela. Bóndima kaka, bózála na kondima.

¹²¹ Nayebi yo te, madame. Natikálá komona yo na bomoi na ngai te, nayebi eloko moko te na ntina na yo. Ezali solo, boye te? Yesu Klisto ayebi yo. Soki Nzambe amonisi ngai ntina oyo oyeli awa, okondima Ye, mpe okondima ete nazali mosakoli na Ye? Soki Akosala yango, oyebi ete Eloko moko esili kopakwela ngai. Osengelaki koyeba ete ezali Yango. Sikawa soki nalobaki: “Nakotia maboko likolo na yo, bikisama,” okoki kozala na makoki ya kotia yango ntembe. Kasi soki Nzambe ayebisi ngai likambo moko oyo oyebi ete ezali solo, boye okoyeba soki ezali solo to te. Boye te? [Ndeko mwasi alobi: “Ezali solo.”—Mok.] Ezali bokono ya basi. Opasolamaki, namoni yo kokita na mesa ya lipaso, ná eloko moko ya mpembe na elongi na yo, kasi esimbaki te. Ezali solo. Kasi, molimo mabe wana ebombanaki liboso na monganga, kasi ekoki kobombana liboso na Nzambe te. Zonga ndako, mpe zala nzoto kolongonu, madame, Yesu Klisto abikisi yo mpe apeci yo nzoto kolongonu.

Soki okoki kondima!

¹²² Nazali mopaya epai na yo, madame. Ondimi ete Yesu Klisto, Mwana na Nzambe, azali awa? Ondimi ete Akopesa yo nzoto kolongonu? Bokono ya sukali ezali eloko moko mpamba, mpo na Nzambe kobikisa. Ondimi ete Akopesa yo nzoto kolongonu? Na bongo zonga ndako mpe yamba lobiko na yo, na Nkombo na Yesu Klisto, Mwana na Nzambe. Amen.

Yaka awa, madame. Ondimi?

¹²³ Sikawa bótika kokanisa ndenge wana kuna nsima! Ezali te “kotanga makanisi.” Bokoki kokima yango te sikawa! Tika náatalisa bino.

¹²⁴ Nayebi mwasi oyo te. Tiá maboko na yo likolo na oyo na ngai, madame. Soki Nzambe akolinga komonisa ngai mpasi na yo! Nazali kotala na ngámbo *oyo*, oyebi ete nazali kotánga makanisi na yo te. Soki Nzambe akomonisa ngai mpasi na yo, okondima ete Yesu Klisto azali Mwana na Nzambe, mpe ngai nazali mosali na Ye? Soki ondimi, tombola loboko. Ozali na bokono ya basi, bokono ya basi. Ezali solo. Ozalaki na yango; ozali na yango sikawa te. Obikisami. Kende nzela na yo, mpe sepela mpe zala na esengo.

¹²⁵ Yaka, mesié. Bokono ya kala wana ya loketo, mpe eloko moko ezali kotungisa yo. Ondimi ete Nzambe akopesa yo nzoto kolongonu? [Ndeko mobali alobi: “Iyo.”—Mok.] Akobikisa yo na yango? Na bongo, na Nkombo na Yesu Klisto, yamba lobiko na yo, mpe koba nzela na yo, kosepeláká. Amen. Nzambe ápambola yo, ndeko.

Bóndima!

126 Mbote, madame? Okolinga kokende, kolia biloko na yo ya kitoko lisusu ndenge omesanaki? Ozalaki moto ya kosilikasilika, bongo te? Epesaki yo mpota na kati ya likundu na yo. Kende, mizwela hamburger mpe liá yango, Yesu Klisto abikisi yo. Kende nzela na yo, kosepeláká.

127 “Soki okoki kondima!” Bózala na kondima epai na Nzambe. Bondimi? Klisto oyo na bomoi, oyo-na-nguya-nyonso azali awa sikawa, mpo na kobikisa moto nyonso na kati awa.

128 Bózela moke. Kuna sima na molongo, afandi awa na nse, ezali elenge mobali moko. Kondima na yo ezali monene koleka ndenge okanisaki, mwana. Ozalaki na bokono ya motema, boye te? Soki ezali bongo, telema. Yesu Klisto abikisi yo, mwana. Ozali na nzoto kolongonu. Koba nzela na yo, mpe bikisama.

129 Bondimi Ye? Bózala na kondima epai na Nzambe.

130 Tala mobali moko, nayebi ye te. Tozali bapaya moko na mosusu. Nabanzi ete moto oyo abatisamaki na ntongo oyo. Kasi nayebi yo te, nazali na likanisi moko te na ntina na yo. Ezali solo? Soko Yesu Klisto akomonisa ngai ntina oyo oyeli awa, okondima yango?

131 Bato boni kati na eyanganelo bakoyamba yango sika-sikawa? “Soki okoki kondima!” Bózala bobele na kondima. Bótia ntembe te.

132 Mobali oyo azali na mpasi ya loposo. Ezali solo. Mpe namoni ozali kozwa. . . Ezali mpe bokono ya prostate. Ya solo. Soki ezali bongo, pépá loboko na yo. Namoni eloko moko ya moindo etele mi kati na yo mpe mwasi moko; ezali nde mwasi na yo. Ozali kobondela mpo na ye. Azali mosumuki, mpe olingi ete ákóma Moklisto. Ezali YANGO ELOBI NKOLO. Ezali solo. Kende, kotiela ye maboko, mpe bódndela mpo na ye, ete Nzambe na Lola akomonisa litómba ya makambo oyo ezali solosolo.

133 Ondimi? Ondimi ete Nzambe akosala yango? “Soki okoki kondima!” Nabeti món dengé na kondima na yo. Kuna mosika na sima, ózala ata wapi, tala mpe bika! Zala na kondima na Nzambe, ózala wapi. “Soki okoki kondima, nyonso ekoki kosalema.” Soki okoki kondima! Bótala malamú, Bótala ngambo oyo, bóbondela.

Okoloba: “Ozali kotala nini, Ndeko Branham?”

134 Rebeka, zonga nsima moke epai oyo, chérie. Telema kaka esika ozali. Wana azali mwana na ngai moke ya mwasi, oyo mokolo moko akozala mpe mosakoli moko ya mwasi. Mwasi oyo atele mi wana pembeni na yo, chérie, alati ekoti ya mpembe, azali kotungisama na bokono ya sinusite. Tombola loboko, to telema, madame. Ozali kobondela ete Nzambe ábenga, ásala ete ngai nábenga yo. Ezali solo? Tika ete mwana na ngai moke ya mwasi átiela yo maboko kuna.

O Nzambe na Seko, na Nkombo na Yesu Klisto, napameli molimo mabe oyo ezali kotungisa mwasi wana. Mpe tika ete élongolama, na Nkombo na Klisto. Amen.

¹³⁵ Oh, Nkombo na Nkolo épambolama! Tika ete Nkolo Yesu amimonisa mpe Ye moko. Bondimi ete Azali awa? Na bongo bótika náyebisa bino, moko na moko na bino, soki bokoki kondima yango, Yesu Klisto abikisi bino nyonso, sikawa. Soki maloba na ngai ezali solo *awa*, ezali solo *kuna*. Soki bokosala oyo nayebisi bino bósala, bokoki kobikisama kaka sikawa. Bondimi yango? Boye bótia maboko bamoko likoló na bamosusu. Bótia bobele maboko bamoko likoló na bamosusu, na kati to na libanda. Bótia ntembe te! Nayoki molimo moko ya kokufa matoi kolongwa. Tala Ye oyo, Klisto oyo asekwi!

¹³⁶ O Nzambe na Seko mpe Mopambolami, na Nkombo na Nkolo Yesu, natemeli molimo na mbindo nyonso, na Nkombo na Klisto Nkolo, ete élongwa na esika oyo, ébima kati na bato oyo. Mpe tika ete Molimo Mosanto monene sikawa ábatisa bato nyonso awa, na kondima monene mpo na kondima.

¹³⁷ Oh, Satana, yo molimo mabe, osakani ntango molai mingi. Klisto asili kosekwa, Atelemi awa na mafungola ya kufa mpe ya ewelo ekangami na loketo na Ye. Nguya ya lobiko na nzoto esili kofutama. Mpe tozali kopamela yo, na Nkombo na Yesu Klisto, Mwana na Nzambe na bomoi, ete óbima kati na bato oyo. Bima kati na bango, Satana, ete bákende mpe bázala malamumu.

¹³⁸ Soki bondimi na motema na bino mobimba, ete Yesu Klisto abikisi bino, bótelema, na makolo na bino, mpe bóyamba lobiko na nzoto na Nguya ya Bonzambe ya Nzambe na-Nguya-nyonso. Ezali yango! Lokumu na Nkolo! Nkolo Ápambolama! Bozali, bino nyonso, bobiki. Bótelema na makolo na bino, mpe bópesa Nzambe lokumu! Amen! Nkombo na Nkolo épambolama! Tika ete tósánzola Ye, wana tozali kotombola maboko mpe kosanzola Ye. Bópambola Mwana na Nzambe na bomoi! Amen!



MPE MISO NA BANGO MAFUNGWAMAKI MPE BAYEBAKI YE LIN57-0421E
(And Their Eyes Were Opened And They Knew Him)

MAYANGANI YA KOLAMUKA YA PASIKA

Liteya ya Ndeko William Marrion Branham oyo, eteyamaki liboso na Anglais mokolo mwa Lomongo na mpokwa ya Pasika, 21 sanza ya Minei, 1957, na Branham Tabernacle na Jeffersonville, Indiana, U.S.A., ekamatamaki uta na bande pe ekomamaki mobimba na Anglais. Ndimbola ya Lingala oyo ekomami pe ekabolami na Voice Of God Recordings.

LINGALA

©2023 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org